

ces lacets, le iour manqua çà bas en terre: de dire combien de temps, ny qu'est deuenu cét enfant, c'est ce qu'ils ne sçauent pas & qu'ils ne sçauoient sçauoir. Je me suis laiffé dire que les [176] Mahometans croient que la Lune tomba jadis du Ciel & se rompit. Mahomet voulant remedier à ce defordre la prit, la fit passer par sa manche, & par ce mouuement la refit & la renuoia en sa place. Ce conte de la Lune est autant croiable que celui que ie viens de rapporter du Soleil. Pour conclusion, *Beati oculi qui vident quæ nos videmus*. Bien heureux ceux que la bonté de Dieu a appelé à l'eschole de la verité. Que rendront-ils à sa Majesté pour ce bien fait? Vne constance en la Foy, & vne resolution ferme de viure conformément aux maximes qu'elle nous enseigne, puis que ceux qui ne fuiuent pas les sentiers que ce flambeau leur descouure, meritent de cheminer dans les tenebres.